

Julio Iglesias aske



Bakea Orain eta BAK «oso pozik» Iglesias «berriz aske» dagoelako

Erreskatea ordaindu izanak alaitasuna ozpindu egin duela diote

Nola Euskal Herriko Bakearen Aldeko Koordinakundea (BAK) hala Bakea Orain taldea «oso pozik» agertu ziren atzo Julio Iglesias «berriz aske» ikusteagatik. Hala ere, elkarteon esanetan, «poza ezin da erabatekoa izan, askapena erreskatea ordaindu ostean iritsi delako, eta ez zen hau guk nahi genuena».

A. Z. / BILBO

BAKeko kideen esanetan, «gaur egun alaia da Euskal Herriarentzat. Azkenean duela 117 egunetik esan gura genuen esaldia esan dezakegu: 'Julio aske dago'. Horregatik, gizatasun aldetik poztu besterik ezin dugu egin: zorionak ematen dizkiegu hemendik bai Juliori bai bere lagun eta senideei».

Hala ere, BAKeko kideek aitortutakoaren arabera, «poz hau ez da, ordea, erabatekoa. Elkarte bakezalea garen heinean, ezin gara guztiz alai egon. Ez zen hau nahi genuena. Euskal gizarteak ez zuen nahi Julio erreskatearen truke aske uzterik; euskal gizarteak Julio ezer ordaindu behar izan gabe aske uztea nahi zuen».

BAKeko kideen esanetan, «bahitzaileek ekonomia aldetik nahi zutena lortu badute ere, izugarritzko desgaste politikoa izan dute. Gaur inoiz baino gehiago, ideologia orotako euskal herritarrek indarkeriaz baliatzen direnen edota berau sostengatzen dutenen aurka daude, eta hau na-



BAK-ekoak prentsaurrean agertu ziren askatzeaz hitz egiteko. M. RAMIREZ

✓ «Lazo urdinak zentzua galdu» egin duela eta etorkizunean erabiltzea ez dutela planteatzen iragarri zuten koordinakundekoek.

baritu egin behar da etorkizunean».

Azkenik, «begizta urdinak zentzua galdu egin» duela eta etorkizunean erabiltzea ez dutela planteatzen iragarri zuten koordinakundekoek. Era berean, Tasio Erkizia Iglesiasen askapenaz poztu izanari zera iritzi zioten: «Poz hori ezin da erabatekoa izan; Julioren askapena eskatu izan balu erabatekoa izango zatekeen, baina hori ez zuen inoiz egin».

«GIZARTEAREN ERANTZUN POSITIBOA» Bestalde, Bakea Orain taldearen ustez, «pozgarria» da ingeniari donostiarraren askapena. Alabaina, poza ezin da «erabatekoa» izan, «askapena erreskatea ordaindu ostean gauzatu delako».

«Gaitzesgarria da», dio Bakea Orain-ek, «gizarte demokratiakoan herritarren eskubide eta askatasunak auskalo zer nazio askapen egitasmoren izenean bahitu ahal izatea». Hala ere, elkarte honek «euskal gizartearen erantzun positiboa» azpimarratu nahi izan zuen: «Elkarte bakezaleek sustatu eta euskal gizartearen gehiengoak bultzatu dituen ekimenak ETaren munduari emaniko erantzunik indartsuena izan dira. Erakunde honek aukera bi baino ez ditu: edo desagertu edota eskuzabala izan litekeen gizartearen integratu, beharrezkoak diren adiskidetzak bideak bilatuz».

Bakearen Aldeko Unibertsitate Ekimena aurkeztu dute Bilbon

A. Z. / BILBO

Bakearen Aldeko Unibertsitate Ekimena aurkeztu zuten atzo EHUREN Sarrikoko (Bilbo) kanpusean. Plataforma honek EHUKO, Urrutiko Hezkuntzarako Unibertsitate Nazionalako (UNED) eta Deustuko Unibertsitateko ikasle, irakasle eta Administrazio eta Zerbitzuetako Pertsonaleko (AZP) kideak biltzen ditu.

Pablo Setien ekimeneko bozeramailearen esanetan, «gure lehen ekintzak Julio Iglesiasen berehalako eta baldintza gabeko askapena eskatzea izan behar zuen, baina zorionez Julio gure

artean dugu jada. Hemendik ongi gietorria eman nahi diogu».

Hala ere, Setienen aburuz euren lana ez da Julio Iglesiasen askapenarekin amaitu: «Askozaz haratago jo gura dugu. Unibertsitateak ezin dio bakearen aldeko oihuari entzungor egin. Gure betebeharra gizarteari zenbait balio etiko eta moral eranstea da».

Ekimen honek eratu txostenean, zera ikusten dute premiazko taldeko kideek: «Unibertsitateko kide guztiak bateratzeko gai izan daitekeen ekimena bultzatzea: hor bildu behar dute ikasleek, irakasleek eta AZPko langileek, alde batera utzirik beren

sentsibiltate etiko nahiz ideologikoak».

Ekimen honen eginbehar nagusia «gure artean bakearen kultura ezartzearen alde lan egitea da». Era berean, «gure herriaren gehiengoaren nahi handi hori ere, ETaren desagertzea alegia, geure egiten dugu». Azkenik, dei egiten diete «unibertsitateko hiru estamentuei, bakarka eta kolektiboki gisa, ondoko egunetan sortuko diren ekitaldi guztiei baietzkoa eta babesa eman diezaieten».

Nafarroako Unibertsitate Publikoarekin (NUP) ere jarri dira dagoeneko harremanetan. Ekimenaren hurrengo ekintza sinadurak biltzea izango da.


Gaur erabakiko dute zer egin azaroaren 6ko manifestaldiekin

BILBO

Julio Iglesias Zamoraren askapenaren aldeko Iniziatiba Hiritarrak batzarra egingo du gaur Bilbon. Heldu den azaroaren 6ko Baiona, Iruñea, Gasteiz, Donostia eta Bilbon deituak zituen manifestaldi deialdiei eutsi ala ez erabakiko dute, besteak beste, batzar horretan, Xabier Gereñi Iniziatibako partaideak atzo jakinarazi zuenez. Deialdiei

eustekotan, «ETaren aurkako mezuak hartuko luke protagonismoa» azaldu zuen Xabier Gereñok.

Bakearen Aldeko Koordinakundearen (BAK) egoitzan egingo den batzarrean Iniziatiba Hiritarraren etorkizuna ere eztabaidagai izango da. Gereñoren arabera, «gure etorkizuneko eginbeharra BAK bezalako beste zenbait elkarte indartzea izan daiteke».



EGITARAUA

Goizeko 10etan: DIANA, herrian zehar.

12etan: AEKren EKITALDI NAGUSIA.

13etan: DANTZA SAIOA.

BERTSOLARIAK.

14etan: HERRI KIROLAK.

PUENTING eta ESKALADA (14etatik 16etara).

ARTISAUEN ERAKUSKETA (egunean zehar).

SUSTRAIAKEN txosnan talo eta txorizoa.

14,30ean: HERRI BAZKARIA.

15etatik 17etara: Haurren parkea - Txotxongiloak "ORREAGA" Kukubiltxoren karpan - Puzgarriak.

16etan: KANTALDIA (ANJE DUHALDE, ZATIKI, BITTOR AIAPE, PATXI SAIZ, EITIÑE).

17etan: Antzerkia MASKARADA taldearekin (Kukubiltxoren karpan).

18,30ean: Erromeria EGANekin.

Guzti honekin batera egun osoan zehar kale animazioa: txistulariak, trikitilariak, dultzainariak, hankapaluak, mimoa,... izango da Arrigorriagako kaleetan barrena.